



**السلام عليكم ورحمة الله كيف حالكم عاملين
ايه؟**

الله يبارك فيكم يارب ويرضى عنكم. منورين
يارب يوفقكم في الإمتحانات، ويبارك لكم في
وقتكم ويسر لكم الخير يارب، ما شاء الله اللهم
بارك اللهم بارك عاملين إيه في الإمتحانات؟
بتذاكر ولا لسه؟ هتذاكروا أمتى .. اللايف
جاي لكم في وقت مش مناسب. بس هنعمل
ايه؟؟ لازم نكمل، أنا وعدتكم نكمل في سلسلة
أمهات المؤمنين ولزام أوفي بقى بس هو جه

الوقت صعب شوية، بس إن شاء الله
منطولش...

مزنوقين في الإمتحانات طب أنتوا مزنوقين
في الإمتحانات جاين تحضروا لايف ليه؟
روحوا ذاكروا يا جماعة كلمتين ينفعوكم أنا
مش مسئول عن أي حاجة هتحصل أنا عارف
لما النتيجة تطلع هتقولوا الشيخ علاء هو
السبب هو البشمهندس اللي عمل في كده أنا
مليش دعوة بأي درجة مش تمام هتطلع أنا
قلت اللي وراه مذاكرة يروح يذاكر، إحنا كده
كده شغالين أنا قلت اللي عندي اللي عايز
يحضر يحضر بقى، أنا جاهز أنا خلصت
مذاكرتي من زمان. أخرجت الفين وستة قبل
ناس مكنش أتولدت أصلاً. في ناس فيكم
اتولدوا بعد ما أنا أخرجت... إحساس صعب

جدا، حاسس إن أنا كبرت خلاص الناس
هيقومولي في المواصلات. يقولولي ياعمو
خلاص بقى. هو فعلا اللي بيحدد على الميديا
كتير الصراحة المفروض يحضر يعني أنت
عندكم مذاكرة ومتجيش بقى لما توفري وقت
توفري الوقت بتاعي أنا بقى لا الأول نتأكد إن
إحنا وفرنا كل الوقت الثاني.

بمعنى هل أنتِ قللت القعاد على النت؟

هل أنتِ بطلت تقعدي ساعات على الواتس
وعلى الفيس وعلى اليوتيوب هل أنتِ قللت
وقت نومك وبتاكلي بسرعة؟ بتنامي أقل؟
مبتتكلمش في التليفون كتير. بعد بقى منخلص
الإجراءات دي تيجي بقى على الأوراد. وعلى
فكرة دي نصيحة ..سيبك من علاء. دي
نصيحة قولولي بيحصل ولا لا. بعض البنات

وبعض الشباب أول ما بيتزنق في المذاكرة
بيجي على الأوراد.. أوراد المراجعة بيجي
على ورد صلاة النوافل قيام الليل. أول حاجة
بيتيدي يضحى بها الأوراد، الحاجات الدينية
بنقول له المرحلة دي متأخرة جداً المفروض
ماتلجأ لهاش إلا بعد ما تكون فعلاً بأمانة
وبضمير و بينك وبين ربنا عملت كل
الإجراءات الثانية. هل أنت فعلاً قللت وقت
الميديا؟ قللت وقت الأكل والشرب قللت وقت
الهري مع صحباتك و تضييع الوقت اللي
ملوش لازمة...ناخد من كل ده الأول قبل ما
تيجي على ورد القرآن قبل ما تيجي على
درس العلم قبل ما تيجي على أذكار الصباح
والمساء قبل ما تيجي على قيام الليل مش هو
ده أول حاجة ما هو ده يدل على هوان الدين

في قلوبنا إن أنا دلوقتي مزنوقة في ساعة
خلاص أخذ الساعة بتاعة الدرس بتاعت
اللايف طب ليه؟ خدت الساعة بتاعة اليوتيوب
خدت الساعة بتاعة الفيسبوك خدت الساعة
بتاعت الهري في التليفون خدت الساعة الزيادة
اللي في النوم؟ لا يبقى في حاجة غلط، يبقى
أنا فعلا لو حريص على ديني هبتدي الأول
أضحى بكل حاجة كل المباحات كل حاجة في
أيديا أقدر أضحى بها عشان أوفر وقت وأقول
يارب أقدر أحافظ على كل أوقاتي مع إن أنا
بذاكر فعلا... لكن لما الاقي أول ضحية عندي
دينى يبقى في حاجة غلط يبقى أنا أزعل مش
عشان علاء حامد .. لا أنا مش بتكلم على
نفسى، أزعل فعلا إن إحنا بعد كل اللي علمناه
لكم دا، وبعد كل الهم اللي أحنا حطيناه في

قلوبكم دا، بعد ما عظمنا قدر الدين في قلوبكم،
أول يوم ما ضحيت ضحيت بدينك..

مش هقولك دينك عدت فاسقة مثلاً.. لا يعني
ضحيتى بالمستحبات جيتي على الأوراد جيتي
عالأذكار طب ليه رغم تضبيع الوقت اللي
عالفيس وعلى اليوتيوب مبيتغيرش والتليفونات
الكثير مقلتش وتضبيع الوقت في الشوارع
وأنت رايحة وجاية من المعاهد والدروس
والنوم زي ما هو والأكل زي ما هو. ليه
يعني؟ خلاص هو يعني الدين هو اللي معطلنا؟
لا. لكن لو عملت كل ده بقى وخلاص وفي
وقت مزنوق قوي يعني ممكن ابتدي أشوف
هأقلل أيه شوية مؤقتاً وهرجع بسرعة. بس
فعلاً ماشي مش هقدر أحضر اللايف المرة دي
ماشي، هجيب جزء مش جزئين النهاردة

ماشى، بس بعد ماتكوني عملتي الإجراءات
دي واخدين بالنّا؟..

أنا جاي أتكلم في موضوع ثاني إنتم ليه
بتجربوني للزعيق؟ إحنا قولنا اللايفات اللي
كنا بنزقق فيها خلاص، نهدي بقى شوية
بتعصبوني ليه؟ ماشى. طيب خاينا نسأل سؤال
قبل ما نبداً ..حد فيكم يا بنات وشباب يعرف
حاجة عن السيدة سودة بنت زمعة يلا جاب
مين يعرف حاجة؟ مين يعرف سيرة السيدة
سودة بنت زمعة؟ اللي هي مفروض أمنا وأم
المؤمنين وأحنا بنحبها والمفروض دي حاجة
نبقى حريصين إن أحنا نعرفها أنا عايز
الإجابة بتاعة لا دي علشان أقول عيب أحنا
مقصرين قوي. ما فكرتيش في حياتك كده؟
تكتبني على اليوتيوب سودة بنت زمعة رضي

الله عنها. ونسمع كده ولو عشر دقائق تعريفية بها...

بنقعد قد أيه أحننا نتفرج على الكرة ،طيب خاينا النهاردة كأننا بنعتذر للسيدة سوداء، خلاص اللي حصل حصل وإحننا قصرنا في حقها ونعتذر لله سبحانه وتعالى ده حق يا جماعة، حق النبي عليه الصلاة والسلام. (قل لا أسألكم عليه أجرا إلا المودة في القربى) يعني قريبتى، أهل بيتي، أوصيكم الله في أهل بيتي. فإزاي أحننا أهل بيت النبي عليه الصلاة والسلام نبقى مقصرين في حقهم؟؟ عيب والزوجة يعني سودة هتشوفو دلوقتي زوجة مميزة جداً هي ممكن متكونش من المشاهير زي عائشة وحفصة وكده بس أنتم لما هتعرفوا القصة بتاعتها تقولوا إيه ده أحننا إزاي معرفناش

القصة دي قبل كده وإزاي منعرفش هذه المرأة
العظيمة إحنا دائماً سوداء بتتحفظ كاسم بس
من زوجات النبي عليه الصلاة والسلام سوده
بنت زمعة مبن دي فبن حصل إيه محدش
عارف حاجة. طب ليه؟

وإحنا جايين النهاردة نعتذر لله سبحانه وتعالى
أولاً، ونعتذر للنبي عليه الصلاة والسلام،
ونعتذر لسودة رضي الله عنها عن تقصيرنا
في حق آل بيت النبي عليه الصلاة والسلام..
يا جماعة أحنأ أهل السنة المفروض يكون
حرصنا على هذه السير أحسن من
الشيعة. طيب. يلا بنا جاهزين؟ إحنا كده
سخنا؟ علشان نبداً بقى نركز وأحنأ بنسمع
الدرس مكسوفين والله عيب أحنأ إزاي مكنتش

أعرف الكلام دا قبل كده. تمام؟ يلا بنا هنبدا
بسم الله الحمد لله وأشهد أن لا إله الله

**وحده لا شريك لك. وأشهد أن محمدا عبده
ورسوله صل الله عليه وسلم. أما بعد...**

أهلا ومرحبا بكم في لقاء جديد. لايف جديد.
المرة دي هنرجع نكمل اللي بدأناه قبل كده من
فترة سير أمهات المؤمنين. اللي معارفش إحنا
خدنا قبل كده درسين بس أحنا لما نيجي نرتب
السلسلة ممكن هنرتبها بعد كدا بترتيب
الزوجات بس قبل الدرس ده كنا خدنا درس
عن أم سلمة رضي الله عنها وأرضاها وخدنا
درس عن صفية بنت وحياة بن أخطب رضي
الله عنها وأرضاها. لكن يمكن لما نيجي نرتب
السلسلة نرتبها حسب ترتيب زوجات لكن دي
ثالث مرة نتكلم فيها عن زوجة من زوجات

النبي عليه الصلاة والسلام وزى ما قلت لكم
إن أحنأ بنحاول نوؤدي حق النبي عليه الصلاة
والسلام وإحنأ بنقول الكلام ده وإحنأ مكسوفين
قوي إن إزاي أحنأ بنحب النبي عليه الصلاة
والسلام ونتمنى نحشر معه. والبنات تقول
يارب ببقى مع زوجات النبي عليه الصلاة
والسلام في الفردوس الأعلى، والكلام دا وفي
الآخر تعرفي حاجة عن سودة بنت زمعة؟ إيه
ده أنا حافظة اسمها بالعافية. يعني أنا لما بقول
الزوجات مبفكرش أصلا الاسم بتلخبط فيه
بنسأه عارفين كل مرة أقول الزوجات وانسى
دا كل شوية أنسى سوداء أنت ناسية الاسم.
أمال بقى يارب يحشرني معها يارب أحشرني
مع زوجات النبي عليه الصلاة والسلام، طب
يعني كلام بس أحنأ في الواقع عيب، يعني

أحنا بنسـتحي من الله سبحانه وتعالى يكون
كلامنا غير واقعنا. فلما أقول يارب أحـشـرنـي
مع النبي عليه الصلاة والسلام وما أعرفش
سيرته. عيب، لما أقول أحـشـرنـي مع الصحابة
ومقرتش كتاب عن الصحابة. طب ازاي؟
أحـشـرنـي مع زوجات النبي عليه الصلاة
والسلام وأنتِ مبذلتيش مجهود في البحث عن
سير زوجات النبي عليه الصلاة والسلام، أحنا
قلنا خلاص اللي حصل حصل، وقدر الله وما
شاء فعل. وربنا يسامحنا على تقصيرنا اللي
فات ...

يلا بنا بقى نتعرف على هذه المرأة العظيمة.
المرأة الجميلة المرأة التقية النقية الصالحة
الصوامة القوامـة الأم الجميلة الطيبة. إن شاء
الله هنكمل السلسلة دي ان شاء الله أوعدكم

هنكمل السلسلة دي وهتبقى تحت كده بتلاقوها
في سلسلة أمهات المؤمنين ويمكن نعمل عليها
دورة بعد كده او عموما هنعملها ونسيبها لله
سبحانه وتعالى. تنتفع بها أو نعمل بها دورة.
بس المهم يا جماعة لازم الموضوع ده
يتغطى. ولازم نوذي حق آل بيت النبي عليه
الصلاة والسلام. طيب إحنا النهاردة مع قصة
سودة بنت زمعة...

أول معلومة عندنا إن أحنا منعرفش حاجة
عنها أصلاً. يعني للأسف بنات اليومين دول لا
تعرف شيئاً عن سودة بنت زمعة وخايننا
نعترف بذلك ونقر ونستحي ونتكسر كده قبل
الدرس. من هي سودة بنت زمعة؟؟ وإيه
دورها والمرأة العظيمة دي إحنا عايزين
نتعرف عليها يلا بينا ... بسم الله الرحمن

الرحيم سودة بنت زمعة رضي الله عنها
وأرضاهما خلينا الأول نتعرف اسمها سودة بنت
زمعة بن قيس رضي الله عنها وأرضاهما،
إمراة قرشية من قريش سوداء إمراة كبيرة في
السن جسيمة سميمة يعني طويلة عريضة
جسيمة وزنها كبير ،كبيرة في السن دي أكبر
من النبي عليه الصلاة والسلام وكانت إمراة
ممتلئة شوية كده. قصتها إن هي من أوائل من
أسلم، ودي حاجة جميلة بنتعرف عليها مع
السيدة سودة بنت زمعة وإحنا بنشوفها كده.
خدوا بالكم هنقارن بينها وبين خديجة رضي
الله عنها وأرضاهما عشان الموضوع ده هيفرق
معنا في الكلام اللي جاي.. السيدة سودة كانت
من أوائل من أسلم وأسلمت قديما مع النبي
عليه الصلاة والسلام يعني في المعمارك في

مكة. يعني امرأة صلبة امرأة قوية مش أي حد
يا جماعة قدر إن هو يسلم في مكة في عز
الطحن وفي عز الآلام وفي عز التعذيب. هذه
المرأة الجلدة الصلبة القوية أسلمت رغم كل
شيء رغم كل التحديات رغم كل الصعوبات.
أسلمت إسلاماً قوياً جداً. وكانت متزوجة ابن
عمها. مين ابن عمها؟ كان صحابي جليل يدعى
السكران بن عمرو والجميل إن السكران بن
عمرو برضو أسلم. يا سلام! يا جمال البيت!
لما يبقى الزوج والزوجة ملتزمين. الاثنين هي
أسلمت وهو أسلم. الاثنين أسلموا. والبيت نور

بإسلام الاثنين. يا فرحة السودة بإن زوجها
أسلم. ويا فرحة السكران بن عمرو لما زوجته
أسلمت قد إيه بيبقى معنى جميل وفرحة كبيرة
قوي في بيت الواحد فينا لما يلتزم فزوجته

تلتزم معاه. لما تتوب فزوجها يتوب معاه
وببقى طبعاً الموضوع فيه صعوبة على
النفس لما يحصل العكس. وده بيحصل عادة
في البيوت اللي هي بدأت الزوجين مش
ملتزمين في البداية يعني بدأنا .. مكناش
ملتزمين مشوا مع بعض وبتاع والصحوية
المهم ربنا هداهم و أتجوزوا بعد كده ربنا هدى
الزوجة أو ربنا هدى الزوج هنا بقى إيه مشكلة
إن الزوج بيحاول يقنع زوجته إن ربنا يهديها
تبطل أغاني وأفلام وتحسن حجابها والكلام ده
أو العكس الزوجة ربنا هداها تحاول تصحي
زوجها الفجر تحاول تخليه يبطل سجائر طب
أنزل صلي في المسجد طب نطلب علم بيبقى
صعب عن نفس المرحلة دي بتبقى ثقيلة قوي
على النفس ومش سهلة طبعاً. لكن بنقول

نصيحة يا أخوانا لكل زوج وزوجة بيسمعوني
دلوقتي. إذا ربنا هدى زوجتك، يا أخي أفرح
عارف حتى لو أنت لسه يعني الدنيا مش
ماشية معاك. متصدهاش أو عدها، قولها طيب
بصي أنا مش قادر دلوقتي، بس أنا عايزك
تزني علي أنا مش هزعل منك تمام أنا مش
هزعل منك قوليلي بس متتكيش عليا بس
أقعدني فكريني وشجعيني وأبعثيلي حاجات.
وبإذن الله ربنا هيهديني وادعيلي. على الأقل
متصدهاش ويمكن نيتك النضيفة دي ربنا
يهديك بها. مع إنك أنت بتقفل مجالس. بس
يمكن يهديك بالكلمة الحلوة. متصدهاش بقى..
العكس الزوج ربنا هداه، وبيقول لزوجته
حبابك يا ستى بطلتي البنطلون. أنا جوزك وأنا
دلوقتي بشيل سيئات بسببك، شعرك اللي

طالع، الأغاني اللي مشغلها لنا في البيت،
المسلسلات اللي شغالة في البيت. ياستي
خلاص بقى ربنا هداني بقى. عايزين نبطل
الكلام ده وعلى فكره ممكن يعمل الموضوع
ده بالأمر وبالخناق وحقه، بس هو رجل
محترم وبيتكلم بأدب. يعني الرجل عشان
كويس وبيتكلم وبيراعيك ومقدرك تروحي بقى
تشوفي نفسك لا بقي أنت وأخذنى كدا . سبحان
الله! هو فيه حد يرفض الهداية يا جماعة! هو
فيه حد يزعل إن ربنا يهديه! هو فيه حد
يرفض نعمة إن ربنا هدى زوجته ولا جوزك
ربنا هداه.. المفروض نفرح حتى لو أنت لسه
الدنيا مش ماشية معاك تقوليله والله يعني طب
شجعني شوية طب ساعدني طب اشتريلي
حجاب وإن شاء الله هلبسه طب بص خليك

ورايانا نفسي، يعني الكلام الحلو بيريح لكن
الصد وحش جدا ومؤلمة وبيجيلي أسئلة صعبة
جدا تقول أنا توبت وزوجي مش عايز. الزوج
يقول أنا ربنا هداني وزوجتي أطلقها ولا أعمل
إيه يا عم الشيخ ولا أصبر عليها؟ طب إيه؟ إيه
إحنا بنخش في الكعبة دي؟ هو جوزك ضل
ولا اهتدى؟ هي مراتك ضلت ولا اهتدت؟ ده
حصل الحلو، الحلو هو اللي حصل، الجميل
هو اللي حصل، ربنا هداه المفروض نفرح
حتى لو أنا مش كويس أفرح إن اللي جنبني
كويس. لو أنا مش كويس أفرح إن إبنني بقي
كويس. وأقول يارب اهديني. ففرحة سودة إن
جوزها تاب معها. والسكران يا فرحته إن
سودة أسلمت معاه. والبيت كامل أسلم يا
جماعة... عارفين مين السكران بن عمرو ده يا

جماعة؟ السكران بن عمرو. أخو سهيل بن عمرو. عشان تعرفوا إن السكران ده واحد أسلم في وسط مدعة يعني زي ما بيقلوا بالبلدي بالمصري. ما أسلمش في وسط سهل. عارفين يعني سهيل بن عمرو عارفين مين سهيل بن عمرو يا جماعة؟ سهيل ابن عمرو رجل مش سهل رجل سيد في قومه سهيل بن عمرو لما هتمشي مع بعض في سيرة النبي عليه الصلاة والسلام هنوصل لأن سهيل بن عمرو ده هو اللي كان بيفاوض النبي عليه الصلاة والسلام في صلح الحديبية، كان هو ده المفاوض الأخير اللي فعلا الصلح تم على أيده راجل زكي رجل قوي رجل عنده حزم وشدة مش سهل ابنه أسلم حبسه، سهيل بن عمرو أسلم حبسه ..أبو جندل ابن سهيل بن عمرو

ولما جه صلح الحديبية أبو جندل هرب من البيت وراح للصحابة، سهيل بن عمرو قاله هأخذه وفعلا في الآخر خذه. يعني إذا شخصية فكونك بتقول سهيل بن عمرو أخوه يسلم أكيد مكنش الموضوع سهل أبداً. ومرات أخوه أكيد الموضوع كله مش مكنش سهل...

أنا بس باديكى رؤية إن مين اللي أسلم السكران بن عمرو أخو سهيل بن عمرو اللي هو لما إبنه أسلم حبسه وضربه بالقلم قدام النبي عليه الصلاة والسلام زي ما هنشوف في صلح الحديبية. فتخيل صعوبة إن أنت كواحد تسلم وأخوك كده. وإن مرات أخوك الوضع عامل ازاي؟ لأ تعبوا تعبوا تعبوا تمام دينك غالي، سودة تعبت في الدين عشان كده ربنا كافئها وربنا كرمها والنبي عليه الصلاة

والسلام قدر قد ايه تعبت سودا وأتجوزها في
الآخر تقدير لها تقدير لها علشان أكيد الست
تعبت تمام .

اللي عايز أقوله إن لا إسلام سودة وإسلام
السكران كان قصة أكيد كان قصة من غير ما
أعرف التفاصيل. تمام .

وسهيل بن عمرو طبعاً على فكرة سهيل ابن
عمرو أسلم بعد كده. سبحان الله!

سبحان الله! سهيل بن عمرو أسلم بعد كده.
أسلم متى بقى يا شباب ويا بنات؟

عارفين أسلم متى أسلم بعد غزوة حنين، يعني
بعد الفتح بشوية كمان، أسلم بعد فتح مكة
بشوية وبعد كده سهيل بن عمرو قلب الدنيا
بقى يا جماعة، بقي من أفضل فرسان

المسلمين وكان في خلافة أبو بكر وخلافة
عمر حاجة رهيبة جدًا جدًا ،ومات في
معارك طبعاً ايه ؟ أظن مات في معركة
القادسية راضي الله عنه وأرضاه ،حاجة فخمة
يعني، بس طبعاً على ما أسلم يعني كان الدنيا
كانت صعبة.

المهم إن اللي سودة اللي بيدلك على قد ايه
تعبت المرأة ديت إن هي اضطرت هي
والسكران يهاجروا للحبشة.

﴿ أنت عارف يعني إيه واحد يهاجر

للحبشة؟ يعني ده مستضعف لدرجة إن مش

قادر يقعد في مكة، بس خدي رؤية ايه؟

إحنا بنتكلم عن مين؟ واحدة من كثر الألم اللي

تعرضت له والسكران بن عمرو من كثر

الضغط اللي حصل عليه من عيلته ويمكن
تعرض لايزاء أو تعذيب.

أذن لهم النبي عليه الصلاة والسلام أنت
وزوجتك هاجروا للحبشة من البيوت اللي
هاجرت لليه؟

اللي هاجرت للحبشة.

هاجروا للحبشة قعدوا هناك ،طبعاً الهجرة دي
كان فيها مين بقى؟كان فيها رقية أنتم عارفين
أول بيت أصلاً هاجر رقية وعثمان الله!

هجرة الحبشة الأولى أول بيت هاجر مع النبي
عليه الصلاة والسلام، حط مين في الأول رقية
وعثمان، ليه؟ قدوة قدوة رغم إن رقية في
حماية النبي عليه الصلاة والسلام وعثمان
رجل شريف في حماية عيلته، لكن النبي عليه

الصلاة والسلام بعت رقية وعثمان كقذوة
للصاحبة اللي عايزين يهاجروا، أدي أول حد
بقدمه بنتي وجوزها، مع إن عثمان ورقية
هيبقوا هم المرجعية للناس ديت لإن دول
متعلمين وقاريين وحافظين فدول هيبقوا
بالنسبة لهم الشيوخ اللي ماسكين أو الدعاة اللي
ماسكين الرحلة ديت.

طلع وكانت بقى سودة كانت صاحبة رقية بقى
في الرحلة ديت وكان بينهم مواقف جميلة
،وطبعا سفر بقى سفر وقاعدين مع بعض
،ومعها بنت النبي عليه الصلاة والسلام فقربوا
من بعض أوي، وده حاجة هتفيدنا كمان شوية
فكانوا صحبة حلوة. ورقية اتعرفت على
سودة حبيبتها أوي أوي، ست تتحب يا جماعة
وهنشوف كمان شوية ،وسودة اتعرفت على

رقية وبقت زي بنتها، فعاملها زي بنتها بقى
خلاص من قبل ما تتجوز النبي عليه الصلاة
والسلام، اللي حصل بعد كده أنتم عارفين ان
حصل إن بعض في هجرة حصلت كده إشاعة
إشاعة إن أهل مكة أسلموا.

طبعاً الأخبار بتوصل ما بتوصلش بدقة على
ما انتقلت بعض الأخبار اللي هي كانت سببها
ايه؟

لما النبي عليه الصلاة والسلام قرأ على
المشركين سورة النجم سجدوا في آخرها
عارفين القصة المشهورة ديت هتيجي لنا في
السيرة، سجدوا في آخر السورة، فسجدوا بس
ما سجدوش عشان أسلموا، سجدوا علشان
تأثروا بالقرآن بس. بس هما مأسلموش
،فالإشاعة اتطورت وعلى ما وصلت الحبشة

وصلت إن أهل مكة أسلموا ،ففي جزء من المهاجرين اللي في الحبشة قالوا نرجع بقى خلاص ،فجزء منهم رجع اكتشفوا الإكتشاف أن ما حدش أسلم ولا حاجة، وبعد كده منهم اللي رجع تاني الحبشة ومنهم اللي دخل ايه؟

اللي دخل مكة وخلاص ،بس اللي دخل مكة دخل في حماية بنسميه الجوار حماية ،وكان من اللي دخلوا مكة في حماية كان اسمها سودة رضي الله عنها وارضاهها.

تمام. سودة بنت زمعة دخلت في جوار عثمان بن مظعون ،دخلت في جوار عثمان ابن مظعون والسكران بن عمرو بقى في الفترة دي مات مات هل مات في الحبشة ولا مات بعد ما دخلوا مكة؟

في خلاف في الموضوع دوت لكن هو في
الفترة دي مات إما مات في الحبشة رضي الله
عنه وأرضاه أو مات بعد ما رجع هو وسودة
رضي الله عنها إلى مكة.

المهم مات في الفترة ديت ، وظلت سوداء بلا
زوج وامرأة كبيرة في السن ليس لها أحد ،
أبوها كافر لسه كافر زي ما هنشوف ،أخوها
لسه كافر ،مالهاش حد ،وامرأة صلبة قوية
محافظة على دينها. رغم ان أبوها كافر أخوها
لسه كافر جوزها مات، كبيرة في السن وثابتة
ثبات غير عادي، لكن كل ده والنبي عليه
الصلاة والسلام ما جاش في باله إنه يتجوزها
لغاية دلوقتي ليه خديجة عايشة؟ والنبي عليه
الصلاة والسلام يعني من تقدير لخديجة إن هو
اصلا ما فكرش إن هو يتجوز عليها في حياتها

خالص. تقدير طبعاً لخدمة خديجة هو ما جاش
في باله يمكن الظروف أو تقديرًا لخديجة أو أو
أو المهم إن هو لم يتزوج على خديجة أصلاً
رضي الله عنها وأرضاها، ثم كان الحدث
الصعب على النبي عليه الصلاة والسلام هو
إن خديجة رضي الله عنها ماتت وتركت فراغ
هائل. في حياة النبي عليه الصلاة والسلام.
وإحنا شوفنا في درس السيرة قد ايه كانت
خديجة عون للنبي عليه الصلاة والسلام، سند
فعلاً كان الضهر كانت كلامها الحلو يثبتته
،كان يخش يقول زملوني زملوني فهي اللي
تبقى يعني تكلمه كلام يهدى عليه الصلاة
والسلام امرأة قوية امرأة كانت حنينة وفي
نفس الوقت صلبة خد بالكم من صلبة وحنينة
دي عشان هرجع لها كمان شوية. كانت امرأة

صالبة قوية وفي نفس الوقت طيبة حنينة
كلامها حلو تقدر تستوعب اللي قدامها بسهولة
وفعلا كانت فعلا أحسن حد يصاحب النبي
عليه الصلاة والسلام في يصاحب النبي عليه
الصلاة والسلام في الايه؟ في هذه المرحلة

الشاهد يعني إن خديجة ماتت رضي الله عنها
وأرضاهها ، النبي عليه صلى الله عليه وسلم
بكى وتألم مش عايز أقول لكم يعني. يعني
لدرجة ان السنة اللي ماتت فيها خديجة اتسمت
عام الحزن، يعني عامل حزن، عام عام
الحزن هم.

فشوف بقى قد إيه الألم اللي أصاب النبي عليه
الصلاة والسلام ؟

بموت خديجة حتى ان هو اي حد اصلا بيفكره
بخديجة كان كان يبكي عليه الصلاة والسلام

وكانت عائشة رضي الله عنها كان يقعد يتكلم
عن خديجة كثير رضي الله عنها وأرضاها
وحتى قدام عائشة وهي أحب الناس إليه، تمام
بعد خديجة. فكانت عائشة تقول يعني انت
يعني ربنا أبدلك خيرا منها يقول لا والله لا
والله ما أبدلني خيرا منها.

لا والله ما أبدلني خيرا منها. وكان يقول لا
تؤذيني في خديجة وكان بيكلم عائشة اللي هي
أحب الناس إليه.

فلا لا لا اللي هو يا جماعة لا دي في حنة
تانية، ما حدش يتكلم عنها، ما فيش مقارنة بين
خديجة وبين أي حد. فتخلوا بقى لما النبي
عليه الصلاة والسلام كان لو سمع بس صوت
هالة أخت خديجة كانت أحيانا تعدي على النبي
عليه الصلاة والسلام كده تزوره ، فكان يسمع

صوتها يحن أوي. يحن لإن صوت هالة أختها
كان شبه صوتها. فكان يقول أهلا بهالة يفرح
أوي، مجرد أن الصوت ييفكره بصوت
خديجة، فتخيلوا كم بالألم اللي أصاب النبي
عليه الصلاة والسلام لما ماتت خديجة رضي
الله عنها وأرضاها، وسأبت له مش سأبتله بس
فراغ في الدعوي وسند والكلام ده في عيال
في بنات، البنات لسه صغيرين، فاطمة رضي
الله عنها وأرضاها حتى لما ماتت خديجة
رضي الله عنها كانت عندها لسه خمسة عشر
سنة، يعني لسه في في في يعني بنات لسه
عايزين يتربوا. وهو أصلا عنده هموم دعوية،
لسه في هموم دعوية برة وفي شغل وعايز
يتحرك عايز نفس عايز واحدة تبقى جوة مين
هيعوض خديجة؟

مين هيقف في الموقف ده؟ مين هيسد الثغرة
ديت؟ مين يقدر على كده؟

مش عارف، لدرجة إن كان الحزن ببيان
عليه عليه الصلاة والسلام. فجاءته امرأة
تدعى خولة بنت حكيم، خولة بنت حكيم دي
بقى زوجة عثمان بن مظعون اللي أحنا لسه
قلنا من شوية هو ده اللي دخل سوده، فيبدو ان
في علاقة قوية بين خولة وسودة.

إن هي مرات عثمان وعثمان اللي أجار اللي
دخل سودة في حمايته. واضح أن خولة بنت
حكيم علاقتها قوية بسودة وعارفها كويس
راحت للنبي عليه الصلاة والسلام. طبعاً أصلاً
الصحابة الكرام شايفين حزن النبي عليه
الصلاة والسلام. بس ما فيش حد عنده الجرأة
يقول له اتجوز، ما فيش حد عنده الجرأة. يقول

له اتجوز، شايفين مصابه وكان الوقت مش
مناسب. مع أن عادة الصحابة على فكرة. وده
كان زمان عادي لو ماتت زوجته بيتزوج
يعني ده عادي الحياة لازم تستمر فكانوا
بيتزوجوا مش مش بيقعدوا بقى زينا كده واحد
ماتت زوجته ما تتجوزش أبدا أو واحدة ماتت
زوجها ما تتجوزش أبدا كان عادي جدا أن
واحدة يموت جوزها تتجوز أو واحد يموت
تموت مراته يتجوز ده كان شيء عادي لأن
البيوت لازم تمشي والحياة لازم تستمر ومش
لازم دنيا مش هتقف، فعادي كان ممكن
الصحابة يقولوا له اتجوز بس كانوا يهابوا ذلك
الحزن اللي شايفينه عليه، جاءت هذه المرأة
خولة بنت حكيم، وقالت يا رسول الله أراك قد
أصابتك خلة لفقد خديجة، يعني باين عليك

أوي، باين باين تأثر ك باين ألمك، ما الموضوع ظاهر عليك جدًا، إن أنت في فراغ، فراغ بعد خديجة. قالت يا رسول الله إني أرى فيك قد أصابتك خلة لفقد خديجة فالنبي عليه الصلاة والسلام سكت سكت طويلاً.

وكانني بخولة ندمت على السؤال. أصلاً السؤال ده مطروح كل الناس عايزة تقوله مين اللي هيتجرأ ويبتدي ويقول له طب ما تتجوز طب ما نشوف حل، لكن هي بقى أنتم عارفين النساء أجراً ممكن في حاجة زي كده، على اعتبار إن هي اللي هتكون وسيط في الزواج فتبقى سهل هتكلم واحدة الموضوع ينتهي. قال يا رسول الله أراك قد أصابتك خلة لفقد خديجة سكت النبي -عليه الصلاة والسلام- كأن حزن الدنيا اجتمع في وجهه، ويقول: "ومالي لا

أحزن لفقد خديجة، وقد كانت أم العيال وربة البيت" لقد كانت أم العيال، قال كانت أم العيال وربة البيت، هي اللي كانت شايلة البيت وهي اللي كانت تعمل كل حاجة، وأنا مش عارف من غيرها أعمل ايه؟ بص كأن ده وصف الزوجة، الزوجة الصالحة يا جماعة، الزوجة الصالحة هي اللي فعلاً لو فُقدت الزوجة يحس إن هو مش عارف ايه مش عارف يعمل ايه؟ كانت كل حاجة كانت شايلة البيت كانت شايلة الولاد، كنت بعرف أركز كنت بعرف أخرج كنت بعرف اشتغل كنت اعرف أدي درس كنت أعرف أسافر، أنا اكتشفت فعلاً كانت كل حاجة كانت هي فعلاً هي اللي السبب في إن أنا شغال كويس، أنا متكتف من ساعة ما ماتت خديجة، وكأن خديجة بتقول لنا ده دور المرأة

فعلًا الأصل في دور المرأة، إن هي بتأمن
الداخل لزوجها، عشان تساعد هـو يـأمن
الخارج، كل واحد له دور يا جماعة، الزوج له
الخارج بس عشان يشتغل برة ويسهر ويسافر
ويتعب، عايز يـأمن جوة عايز يطمـن على
العيال عايز يطمـن عاليـت عايز يبقـى حاسـس
إن في ضهر في سند، فالمرأة بالنسبة للرجل
سكن، سكن يسكن اليها والرجل بالنسبة للمرأة
أمان خـدوا بالكم الكلمتين دول ومتنسـهمش
أبدًا، ايه أهم دور للمرأة مع الرجل؟ سكن،
وايه أهم دور للرجل مع المرأة؟ أمان، كلمتين
مش هنطول في دي عشان إحنا مش عايزين
نطلع عن الموضوع، بس عايز اقول لكم أهم
دور للمرأة لو ما عملتوش للرجل يبقـى ما
عملتش حاجة، ما عملتش حاجة، يبقـى فشلت

في دورها كزوجة سكن، سكن يشعر معها بالسكون والطمأنينة، وإن الجبهة الداخلية مستقرة، ودور الرجل بالنسبة للمرأة الأخطر الأمان، بتحس معه ان هي مش خيفة على حاجة، مش خيفة من حاجة، مش قلقانة من اللي جاي، مش تايهة، مش بتخاف من هناك إيه؟ هنشرب ايه؟ هنعيش ازاي؟ هتصرف ازاي؟ اه هنتأذى؟ هي حاسة بالأمان، راجل برة كل حاجة تمام؟ هو حاسس بالسكن هي جوة لكل حاجة أمان، هو كده النبي -عليه الصلاة والسلام- فقد سكن فعلاً، فقد السكن، قال كانت أم العيال ورببة البيت، وده يدلك على إن السيدة خديجة بعد بعد النبي -عليه الصلاة والسلام- كانت فوضت له التجارة، يعني بعد كده هل السيدة خديجة اشتغلت في

التجارة بعد بعد الزواج من النبي-عليه الصلاة والسلام-؟ الاجابة لا، خلاص هي فوضت له التجارة وبدأت بقى تتهم ببيتها بجد، يا جماعة كان عندها ايه يعني أربع بنات وإثنين صبيان مخلفة له ستة، ستة يعني ما فيش وقت نعمل اي حاجة تانية، فانشغلت بالإنجاب ورعاية الأولاد وطلعت من ضرها أو ربت فاطمة، وفاطمة ربت الحسن والحسين، عشان تعرف المرأة الصالحة مش اللي هو ايه هو أنا أقعد في البيت ما أعملش حاجة هو شغلتنا نربي العيال، ما هي اللي ربت العيال دي طلعت مين طلعت فاطمة، فاطمة طلعت مين طلعت الحسن والحسين ما هي كده ما كل ده في ميزان الحسنات معلش هو أفضل أربع نساء في التاريخ مين؟ الأربعة كانوا ربات منزل،

خديجة فاطمة آسيا مريم، الأربعة كانوا ربات منزل ماذا يعيب ربة المنزل يعني، مش موضوع إن احنا نتكلم عن حكم عمل المرأة وامتى تطلع وامتى ما تطلعش ده مش موضوعنا بس أنا بكلم ربة المنزل اوعى تفكري إنك قليلة، اوعى حد يقل منك يقول لك انت ما انت ربة منزل تمام، اوعى تفكري إن دورك قليل لا هذا دور خديجة-رضي الله عنها وأرضاها- كانت أم العيال وربت البيت، الشاهد يعني النبي-عليه الصلاة والسلام- تأثر جدًا بسؤال خولة بنت حكيم، المهم خولة - رضي الله عنها وأرضاها- قالت له: "يا رسول الله أفلا أخطب لك؟" اه تجرأت بقى وقالت، أفلا أخطب لك فالنبي-عليه الصلاة والسلام- وكأنه يعني هو عايز محتاج يعني، محتاج

سكن ولازم يتم الأمر وكان دماغه مش مش
قادر يركز مين ينفع للدور ده بعد خديجة،
وعايز وكأنه يعني فرح إن في وسيط نسائي
في الموضوع عشان الوسيط النسائي دوت
هيختار له صح، هو عارف احتياجه-عليه
الصلاة والسلام- فقال-صلى الله عليه وسلم-
لما قالت له كده فقال-عليه الصلاة والسلام:-
"فمن؟" مين شايقة مين فقالت: "إن شئت بكرًا
وإن شئت ثيبًا" والله عندي كل حاجة، يعني
خولة بنت حكيم يعني خاطبة مية مية قالت له
كل الإختيارات موجودة، يعني انت تأمر بس،
عايز ثيب نجيبك عايز بكر نجيبك، كل
الإختيارات متاحة قال لها طب انتي عندك ايه
طب لو بكر بيبقى مين انتي تختاري لي مين
بكر، فهي كانها عايزة يعني خد بالك هي

هتدي اختيارين قال فمن البكر قالت: "إبنة
أحب الخلق إليك" الله ما قالتلوش عائشة قالت
له ايه إبنة أحب الخلق إليك، يعني كأنها كمان
بتسوق بتسوق للسيدة عائشة، ما قالتلوش
عائشة قالت له بنت أبو بكر، ما قالتلوش بنت
أبو بكر بنت أحب الخلق إليك، والنبي-عليه
الصلاة والسلام- اتسأل سؤال صريح من أحب
الناس إليك قال: "عائشة" الراجل ايه ايه ده
قال اسم واحدة مش واحد، صريح جدًا النبي -
عليه الصلاة والسلام- ما اتكشفش إن هو يقول
اسم مراته، ولا إنه يقول أنا قدام الناس دي
أحب الناس إلي، عادي طب من الرجال قال
أبوها، الله هو البيت كله ولا ايه طب احنا فين؟
فالمهم يعني قالت له بص دي بقى ايه دي
فعرف فسكت، وبعد كده قال لها طب ومن

الثيب قالت سودة بنت زمعة بن قيس آمنت بك
واتبعتك على ما انت عليه، فالنبي-عليه
الصلاة والسلام- وافق طبعاً الاثنين مهمين أما
عائشة هي عائشة-رضي الله عنها وأرضاها-
كانت في الوقت ده عندها ست سنين تمام، هي
صغيرة أصلاً كده كده مش هيدخل بيها دلوقتي
خالص، بس هو دلوقتي هو بالنسبة له إن هو
يكسب السيدة عائشة ده مكسب؛ لأنه يريد إن
هو يناسب أبو بكر الصديق، فالسيدة عائشة
مش هي الحل دلوقتي بس هي جه الكلام عليها
في معرض العروض فوجدوا فرصة مناسبة
إن هو يفوز بنسب أبو بكر الصديق، ولكن
الحل الحقيقي كان سودة فهو النبي-عليه
الصلاة والسلام- وافق على الاثنين على طول
قال لها روي للاتنين تخيلوا النبي-عليه

الصلاة والسلام- أصلاً بيتجوز الاتنين في
زمن قريب بس زواجه بعائشة كان عقد بس
كتب كتابه عليها بس ما لم يدخل بها حتى
اكتملت وصارت إمراة مكتملة تطيق الجماع،
وتعرف تشيل بيت وتعرف تتعامل، وكانوا
زمان البنات الستات بيكبروا بسرعة فممكن
تبقى عندها تسع سنين وهي ما شاء الله طويلة
عريضة وإمراة كاملة مش ناقصها حاجة
وتطيق الجماع، وممكن تنجب كمان فعقد
عليها وهي عندها ست سنوات وبعد كده دخل
بها في المدينة بقى لما كبرت وصارت تطيق
النكاح والكلام دوت، فكدده كده العقد على
السيدة عائشة كان مسألة ايه بنكسب يعني
قراية أو نسب أبو بكر الصديق بس مش دي
الحل دلوقتي، بعد كدة قال لها وسودة برضه

كلمتها، هو تزوج الاثنين مع بعض ورا بعض
عقد على عائشة ثم تزوج سودة ودخل بها
السيدة بقى خولة راحت لبنت أبو بكر الاول
ودخلت عليهم بقى ايه يعني قالت، دخلت بيت
أبو بكر قالت: "ما أدخل الله عليكم من الخير
والبركة" وراحت فرحتهم بالخبر السعيد
وطبعًا وافقوا، في ثانية وبعد كده راحت لبنت
سودة تمام فدخلت بقى عايزة تعرض العرض
فبدأت بسودة نفسها فقالت: "يا سودة يا سودة
ما أدخل الله عليكم من الخير و البركة ما أدخل
الله عليكم الخير والبركة" يعني هي لسه ما
قالتش حاجة هي بتسوق قبل ما تتكلم، بتقول يا
سعدكم عارفين الخاطبة لما تعمل كده يا هناكم
ده أنا جيت لكم حاجات حاجة تفرح حاجة
تشرف حد ميترفضش أبدًا، وقاعدة تسوق وما

قالتش طب قولي طب الاسم ايه طيب، يعني
بصوا الخير كله والبركة كلها معايا-صلى الله
عليه وسلم- وصدقت يعني هو في أحلى من
كده هي سودة ايه قالت: "وما ذلك" يعني يا
ريت قولي لنا مين ايه الموضوع قالت:
"أرسلني رسول الله-صلى الله عليه وسلم-
أخطبك عليه" يا سلام ما قالتش بصي برضه
عشان تقدر سودة ما قالتهاش أنا اتوسطت عند
النبي عشان يوافق يخطبك و خليفته يوافق
عليكي مش حلوة، يعني ذوقيات برضو

ذوقيات يا جماعة ذوقيات ❁ لأ...حسستها
إن النبي عليه الصلاة والسلام هو اللي طلبك،
مش أنا اللي عرضت عليه، بتراعي إحساسها،
برضو المرأة تحب إن هي تبان مطلوبة.

مش كده؟ فاهم إزاي؟

حتى لو واحدة خاطبة توسطت، ما تبينيش
للبنات إن أنا اللي جبت هولك، أنا أقنعتة بيكي،
مش حلوة خالص لازم البنات يا جماعة تفضل
تظل تحس إن هي مطلوبة، إن الرجل هو
اللي طلبها، مش هي اللي إيه؟

حتى لو حصل عرض أو كده، مش حرام،
بس برضو نكبر الإيه؟ نكبر العروسة.

يعني فقلت لها ده الرسول أرسلني إليك، عايز
يخطبك، فطبعاً السيدة سودة مش مصدقة
نفسها، بس بقى امرأة زي ما قلنا، هنشوف
كده العقل والرصانة، والدماغ الكبيرة.

قالت: وددت، يعني أنا اتمنى، طبعاً ما فيش
كلام، هو في واحدة ترفض عرض زي ده.

قالت: ولكن أبي.. أبي لابد أن يوافق، أدخلني إلى أبي واذكري ذلك له.

الله!! بجد إيه ده أبوها!! كافر بس كان ساعتها لسه آه يجوز إن الكافر يكون ولي للمرأة، ما كانش لسه نزلت الأحكام بتاعت إن الكافر ماينفعش يبقى ولي للمرأة، فكان لسه ممكن الأب الكافر يزوج بنته المؤمنة، وكان أبوها علاقته بيها كويسة رغم إن هو كان كافر، مءامنش لسه، بس العلاقة كانت جيدة، فقالت اذكري ذلك له.

فدخلت عليه وقالت: إن محمد بن عبدالله، حتى المرة دي ما قالتلوش رسول الله، بص امرأة ذكية أوي.

قالت له: إن محمد بن عبدالله، لم تصفه بالرسالة هنا، إن هو أصلاً مش مؤمن بكده،

بس قالت له بقى إيه؟ قالت له الاسم الفخم
محمد بن عبدالله بن عبدالمطلب، ده أشرف
رجل في مكة، محمد بن عبدالله أرسلني
أخطب عليه سودة، فالراجل بكل هدوء جداً.

الله... الله... على الإنصاف. الله.. على
الإنصاف كفاء كريم، كفاء كريم.

فما تقول سودة؟ الله ده بيرجع الكلام لسودة
تاني!

كفاء كريم، فما تقول سودة؟

فقالت: تحب ذلك.

قال ادعيها، جيبها لي، أنا اللي أسألها بنفسى.

فدعتها، فقال: يا سودة إن محمد بن عبدالله
أرسل يخطبك وأنا أراه كفاء كريم، -الله
أكبر الله أكبر- أفتحبين أن تتزوجيه؟

قالت: نعم.

فقال لخولة: ادعيه لي.

يجي لي بقى هو اللي بييجي يخطبها، تمام؟

قال: فجاء فزوجه هي.

يا سلام ده إيه الجمال؟

ده اتعلم من هنا كذا حاجة:

أولاً رحمة النبي عليه الصلاة والسلام

بسودة .

والموقف الجميل خولة عملت مع سودة

حركة يعني تاريخية وهي عرضت هي ما

ألزمتش النبي عليه الصلاة والسلام بحاجة

قالتله أنا عارفها وأنا قريبة منها وأقول لك

يعني هذه المرأة محتاجة سند محتاجة زوج

فعلا ومن ساعة السكران ما مات وهي يعني
وهي تستاهل فعلا إن انت تقف جنبها وفعلاً
النبي عليه الصلاة والسلام فهم دماغ خولة
وقدّر.

مع إن النبي عليه الصلاة والسلام لو أراد
هياخد أجمل الجميلات وأغنى النساء وأشرف
النساء عادي زي ما تزوج خديجة يتجوز
غيرها رضي الله عنها وأرضاها رغم إن
السيدة سودة في المعايير هي يعني مش في
مسألة الجمال قد كده، ولا المال قد كده،
عادي عادي مراته أكبر منه، كبيرة يعني فيها
سمنة شوية، والكلام دوت.

لكن ذات دين رهيب ما لهاش حل في
الموضوع دوت، فظفر بها النبي عليه الصلاة،

"اظفر بذات الدين تربت يداك" وأراد إن هو
يكرمها، وعارف إن هي من أوائل من
أسلمت، وعرف تعبها جداً في الهجرة راحة
وجاية، وجوزها اللي مات وقلبها اتكسر عليه،
وأبوها كافر وأخوها كافر، وهي لوحدها وربنا
اللي مثبتها.

فأراد إن هو يكرمها وده بيرد على الناس اللي
بتقول لك النبي والسلام اتجوز احدى عشر
مرة، ومش عارف إيه!!

والكلام ده شهواني، ومش شهواني، هذا كلام
غريب..

نقول يعني أولاً هنقول كذا حاجة.

🔁 النبي عليه الصلاة والسلام مبدئياً اتجوز
خديجة رضي الله عنها في عز شبابه، وفي

عز شهوته، اتزوج امرأة واحدة للفترة دي
كلها تمام؟ هو دلوقتي عنده كم سنة عليه
الصلاة والسلام دلوقتي بيتزوج يعني سودة
عنده خمسين سنة يعني أول امرأة تزوجها بعد
خديجة كان عنده خمسين سنة وقعدت هي
لوحدتها ثلاث سنين معاه زي ما هنشوف ولما
دخل بعائشة اللي هو لما جمع زوجتين مع
بعض كان عنده ثلاثة وخمسين سنة تمام بلا
شك يعني بردو لما تيجي تنفي التهمة

ما تنفهاش أوي يعني لما يقول لك مثلاً نبيكم
كان شهواني ومش عارف ايه والكلام الوحش
ده تقولوا أولاً أولاً النبي عليه الصلاة والسلام
هو رجل رجل له شهوة وبكونه يشتهي النساء
هذا لا يعيبه ولا يقدح فيه بل كانت العرب في
الماضي يعني كانت تحمد الرجل إذا تعددت

نساؤه ليه لأنه كان يرون ذلك من الرجولة
والفحولة إن الرجل تتعدد نساؤه يعني فكان
يحمد على ذلك فأصلاً المسألة ديت هي لا
تعيب في شيء هو رجل .

قال عليه الصلاة والسلام حبيب لي من دنياكم
الطيب والنساء وجعلت قرة عيني في الصلاة

عادي رجل يريد أن يتزوج ويحب يتزوج،
وتزوج ما الذي يعيبه لا يعيبه شيء، لكن لو
تأملنا فعلاً في المسألة انت هتلاقي المسألة إن
هو عليه الصلاة والسلام تزوج أول زوجة
بعد خديجة عنده ثلاثة وخمسين سنة، تمام!
وإمراة خمسين سنة، أول مرة يبقى معاه
زوجتين ثلاثه وخمسين سنة، وهتلاقي إن
زيجاته رغم لا شك إن هو ميله للنساء ده
معتبر، لكن غالب زيجاته كان ليها علل

يعني تزوج صفية بنت حيي بن أخطب عشان
تسلم ويأثر على قومها، تزوج جويرية بنت
الحارث لسبب قريب من ذلك، تزوج عائشة
ليوطد علاقته بأبي بكر، تزوج حفصة ليوطد
علاقته بعمر، تزوج زينب بنت جحش عشان
قريبته.

هنلاقي أغلب الزوجات كان في سبب آخر
خلاف مسألة الإيه؟ الشهوة، وإن كان الشهوة
ما بنكرهاش وما تعيوش أصلاً عليه الصلاة
والسلام إن رجل يشتهي أن يتزوج، ما المانع
من ذلك؟

لكن احنا نعتبر ذلك مسبة للنبي عليه الصلاة
والسلام! أين المسبة؟ شيء غريب يعني ثم إن
أصلاً كان من حكمة ربنا إن هو كان لازم
يكون عنده زوجات كتير، عشان ينقلوا عنه

الأخبار بتاعته جوة البيت، مين اللي هينقل
أخباره وهديه وحكاياته مع زوجاته، إلا لو
كان عنده عدد ينقل، لازم عدد ينقل يه الهدى
ده عليه الصلاة والسلام.

المهم يعني إن هو تزوج سودة، وسودة يعني
في المعايير.

إنما فعلا تزوجها لدينها بس زواجها نوع من
الوفاء وإلا فلو كانت المسألة مجرد شهوة
والكلام دوت كان ممكن يتزوج من هي أصغر
من هي أجمل تمام يعني إن هو أكرمها عليه
الصلاة والسلام وهي قدرت الموقف ده جداً
وهنشوف رد الجميل للنبي عليه الصلاة
والسلام هيكون منها إزاي.

فقلنا دي نمرة واحد.

☞ رحمة النبي عليه الصلاة والسلام بسودة.

☞ نمرة اثنين سودة بتعلمنا استئذان الولي

إن المرأة تستأذن ولي قبل أن تتزوج، وتكبره وتحطه بالصورة قبل ما تعمل أي علاقة، قبل ما توعده أي حد.

قبل ما تكلمي أي ولد مش بقول جواز بس ده بمجرد انك تفكري تكلمي ولد، ولا ولد يعرض عليك زواج، فتري عليه! ولا يجي لك عرض زواج عن طريق واحدة صاحبتك فتوافقي! وتكملوا في الكلام قبل ما بابا يعرف!

كل الكلام ده غلط، كل الكلام ده غلط، تمام!

يعني والبنات فضلا بقى عن البنات اللي ممكن تتجرا وتعمل الجريمة الكبرى، إن هي تزوج نفسها بنفسها، واللي هو الزواج يسموه

العرفي، وتقعده هي والولد ويجيبوا أصحابهم
ويشهدوا وخلص احنا كده اتجوزنا!!

شفنا كده في المسلسل والفيلم!!

هذا زواج.. باطل.. باطل.. باطل.. كما قال
النبي عليه الصلاة والسلام، تمام؟ فهذا الزواج
باطل بلا شك.

المسألة فضلا بقى إن هما بقى الاختراعات
الجديدة في الجواز، زواج الدم إن هي تعور
نفسها وهو يعور نفسه نعمل له قفة وقفة الدم
نزل وياللا حظ

القفه بالقفة، والدم في الدم ووو إحنا اتجوزنا
..اتجوزت إزاي يا عم أنت؟؟ اتلحوست
أنت!! مش اتجوزت. اتلحوستوا يعني ده دي
اسمها لحوسة مش جوازة انتم اتلحوستوا روح

.. استحمى ولا روح أغسل إيدك ده مش جواز
ده مش جواز ده هبل اللي إحنا بنعمله ده د
غباء.

البنيت بتنتحر، الولي يا جماعة صيانة للمرأة،
المرأة بيتضحك عليها أنا آسف إحنا معاشر
الرجال نعرف نضحك على النساء من الآخر،
واعرف اقنعك إن أنا كويس وأنا مش كويس،
وأعرف أقنعك إن أنا هعيشك ملكة وابهدلك
بعد كده لكن الإيه؟ الأب العم ناس ليهم نظرة
في الراجل يقولها ده مش راجل، لأ ده كويس،
ده مش كويس، خدي رأيه على طول..

وفي نفس الوقت اتعلمنا من موقف سودة إن
الولي بقى دوره إيه؟ الولي مش حاجة إيه
تسلط، مش ربنا جعله للتسلط على المرأة مش

جعله عشان يجيلها الكفاء يجيلها واحد ملتزم
ويجيلها اخ طيب يروح رافضه بلا سبب.

لا الولي لو جاله الكفاء الكريم وافق ما تقفش
عقبة { فَلَا تَعْضُلُوهُنَّ أَنْ يَنْكِحْنَ } [سورة
البقرة : 232]

تمام؟ فالولي أنت دورك المسؤولية، دورك
إنك تختار لها الكفاء الكريم، فطالما جالها
ما تمنعهاش ما تمنعهاش ما تأذيههاش تمام؟

فالتوسط نحترم الولي و الولي يحترم نفسه بقى
آسف يعني في اللفظ بس يعرف

دوره الحقيقي، مش مش كرباج أنت سودة
رضي الله عنها وأرضاها تعالوا بقى نخش في
الإيه؟ مزية لسودة بنت زمعة رضي الله عنها
وأرضاها

محدث فينا بيأخذ باله منها إيه هي المزية
المزية أن سوده طبعاً النبي عليه الصلاة
والسلام اتجوز مين؟ عائشة وسودة تقريباً في
نفس الشهر لكن عائشة في بيت أبي بكر
الصديق ما دخلش بها إلا في المدينة

أنتم عارفين ده معناه إيه؟ فهمتم؟ فهمتم الميزة
الرهيبة اللي خدتها سودة يا جماعة؟ ولا ما
فهمتوش؟ مش معقول ما فهمتوش

أيوة السيدة سودة قعدت لوحدها لوحدها ليها
النبي عليه الصلاة والسلام كله ثلاث سنين كل
الليالي كل الأيام لا يشاركها أحد فيه عليه
الصلاة والسلام ثلاث سنين وحدها لوحدها
فهذه المرأة فزة من زوجات النبي عليه الصلاة
والسلام خدت ميزة لم تأخذها إلا خديجة دي
قعدت لوحدها مع النبي عليه الصلاة والسلام

ثلاث سنين تستمتع بالنبي عليه الصلاة
والسلام صبح وليل وبيات عندها كل ليلة ما
فيش حد شاركها فيه ثلاث سنين يا سلام يا
سعددها يا هناها وهنشوف برضو قدرت
الموضوع ده إزاي في آخر حياتها اللي عايز
أقوله بقى أن آها تعالوا بقى نسأل هو ليه
سودة؟ برضو ليه سودة؟ هي هي مش مسألة
بس خدوا بالكم بقى دي دي الحنة اللي عايز
أركز عليها دلوقتي مش مسألة تعاطف بس مع
سودة ولا مسألة إن هي موت زوجها وبتاع لا
لا في سبب تاني مهم جداً وهو ده اللي خلى
خولة تقترح سودة وده اللي خلى النبي عليه
الصلاة والسلام يوافق على سودة حلو الكلام؟
إيه هو بقى؟

ان سودة رضي الله عنها فاكرين لما قولت لكم
افتكروا الكلمة اللي قلتها لخديجة؟ كانت إيه؟
صلبة حنونة كانت صلبة وحنونة في نفس
الوقت هادية سودة سودة كانت امرأة زي ما
تقولوا كده إيه؟ دماغها كبيرة ست كبيرة يا
جماعة ست كبيرة وخبرة زي ما بيقولوا كده
فاهمة الحياة، فاهمة الحياة مش لسه هنعلمها
فاهمة هي داخلية على إيه ، وعارفة دورها هي
رايحة فين، ست كبيرة عاقلة قوي قوي قوي
عاقلة فوق ما تتخيلي رصينة حكيمة وفي نفس
الوقت صلبة قوية حازمة وفي نفس الوقت
طيبة جداً وحنونة قوي ودمها خفيف وبتحب
الهزار إيه رأيكم بقى في الشخصية الغريبة
دي؟

تاني السيدة سودة كانت إيه يا جماعة؟ كبيرة
في السن إمراة خبرت الحياة عارفة هي
بتتجوز النبي عليه الصلاة والسلام عارفة هي
داخلة على مرحلة عاملة إزاي؟ عارفة أن هي
جاية بعد خديجة عارفة أن هي داخلة على
على فاطمة وأم كلثوم و رقية، عارفة أن هي
هتشيل هم في الفترة ديت عارفة أن الفترة دي
مش فترة سهلة مش فترة يعني مافيش رفاهية
في الفترة ديت، عارفة أن هي داخلة هتبقى
بدل خديجة وده مسألة مش سهلة أبداً إن هي
تبقى في الدور دوت هي عارفة كده كويس
لكن هي كان صفاتها أصلاً شبه خديجة يعني
تكاد أقرب زوجة للنبي عليه الصلاة والسلام
شبهها بخديجة سودة العقل قريبة من خديجة
الحكمة قريبة من خديجة الحنية والطيبة وإن

هي تحتوي الناس وتحتوي البنات وتحسهم
إن هي أهمهم و أنا مش جاية هنا مرات أب ولا
ولا شغل غيرة ولا الكلام ده خالص دخلت
وكانت صاحبة بسمة كانت صاحبة ضحكة
كانت تحب تهزر كانت استوعبت كل الجو
اللي حواليتها وحتى فاطمة نفسها كانت تعتبرها
زي أمها خلاص وما غارتش منها أبداً لم
يثبت أن فاطمة غارت من سودة أبداً رغم أن
هي جاية مباشرة بعد موت خديجة بعد موتها
بسرعة فالموضوع مش سهل إن تدخل على
على النبي عليه الصلاة فاطمة أنتم عارفين
مكانة النبي عليه الصلاة والسلام في قلب
فاطمة تيجي واحدة تتجوز أبويا في في الوقت
ده وبعد أمي لا الموضوع ممكن يبقى يخش
فيه كلام ثاني

لولا أن سودة امرأة حكيمة عاقلة جداً
استوعبت الموقف استوعبت فاطمة استوعبت
أم كلثوم استوعبت رقية وأصلاً علاقتها برقية
كانت كويسة زي ما هنشوف إن الموضوع ده
فرق معها إزاي؟

ف لذلك السيدة عائشة حتى عائشة على فكرة
كانت بتحب سودة جداً رغم إن ديت المفروض
دي جت بعديها على طول يعني السيدة عائشة
لما اتجوزت النبي عليه الصلاة والسلام دي
الزوجة الثالثة يعني ماتت خديجة ف سودة هي
الزوجة الثانية مين الثالثة عائشة عائشة
الزوجة الثالثة للنبي عليه الصلاة والسلام حلو
معنى كده أن هي الثالثة معنى كده أن هي
كانت هي في فترة كانت هي وسودة بس يعني

إذا دي الضرة الوحيدة ليها وعائشة بقى
صغيرة لسه والغيرة والكلام ده ولسه بنت
صغيرة فوارد يحصل معها كل الحاجات اللي
بتحصل مع البنات تمام؟

لا العجيب إن عائشة ما وجدتش أي تنافس مع
سودة ولا غارت منها ليه؟

ذكاء سودة استيعابها لعائشة صاحبة عائشة
بسرعة حسستها إن هي زي أمها إن هي أنا
مش جاية أنفك

وهنشوف إزاي سودة الوفية برضوا كافئة
عائشة على إن هي فعلاً كانت معاملتها لها
كويسة في أول زواجها

السيدة عائشة حتى بتوصف سودة تقول والله
بتوصف وصف غريب قوي خدوا بالكم أسمع
الكلمة أسمعها عشان كلمة غريبة قوي

قالت عائشة رضي الله عنها وأرضاها والله ما
من امرأة تقول عائشة رضي الله عنها ما من
امرأة ما من امرأة أحب أن أكون في مسلاخها
ما من امرأة أحب أن أكون في مسلاخها من
سودة بنت زمعة من امرأة فيها حدة

تاني ما من امرأة أحب أن أكون في مسلاخها
كلمة في مسلاخها دي كلمة عند العرب يعني
أكون شبهها يعني أكون زيها أكون نفسي أبقى
شبهها نفسي أبقى شبه الست إيه؟ إيه ده؟ إيه
العقل ده؟ إيه الرصانة دي؟ نفسي أبقى زيها

عارفين السيدة عائشة ممكن تغير ممكن تكسر
طبق ممكن تزعق ممكن تعمل مثلاً حاجة كده

اه بسبب الغيرة فعائز تقول أنا بشوف سودة أنا
نفسى أبقي زيكَ أنت كده إزاي؟ إزاي يعني
قدرتي تستوعبينا وتستوعبي النبي عليه
الصلاة والسلام؟ وتحافظي على هدوء
أعصابك وما تغيريش من حد أنا بغير على
طول ممكن أعمل موقف لسه أبقي يعني
وعندك صبر وطولة بال وحينية وأدب
وأخلاق وضحك وهزار أنا دول نفسي أبقي
شبهك ! الله ! ده إيه الجمال ده !

تقول ما من امرأة أحب أن أكون في مسلاخها
من سودة بنت زمعة من امرأة فيها حدة

خد بالك من كلمة امرأة فيها حدة عشان
البعض يفهمها غلط الناس تفتكر لما قالت
عائشة من امرأة فيها حدة يعني امرأة حدة
يعني إيه؟ إن هي بتغضب وتتعصب وشديدة

وبتاع لا ما تقصدش كده عائشة أبداً تقصد
إمرأة فيها حدة إن هي إمراة كانت صلبة قوية
النفس شريفة النفس عالية الهمة رزينة حكيمة
عايزة تقول أن هي عملت حاجات مع بعض
غريبة طيبة وحنينة وعاقلة وراصية وفي نفس
الوقت صلبة وفي نفس شخصية وفي نفس
الوقت قوية في نفس الوقت ضحكة وفي نفس
الوقت استوعبتنا أنتِ إزاي كده؟ أنا نفسي أبقى
شبهك السيدة تخيلوا السيدة عائشة تتمنى تبقى
شبه امرأة ايه ده؟ مين دي يا جماعة؟ مين
دي؟ إزاي السيدة عائشة؟ السيدة عائشة اتمنت
إن هي تبقى شبه واحدة ايه ايه ده؟ مين دي يا
جماعة؟

دي سودة حاجة كبيرة إحنا إزاي ما نعرفهاش
يا جماعة؟ إزاي ما نعرفش القمر ده؟ القمر

سيدة سودة قمر قمر عايش في عاش مع النبي
عليه الصلاة والسلام

وفعلا قدر يستوعب الجميع عشان كده السيدة
سودة من من حكمتها ان هي لما دخلت على
النبي عليه الصلاة والسلام كانت إيه؟ كانت
بتهزر تحب تهزر فبتحب تتلاطف معه عليه
الصلاة والسلام عارفين من الحاجات الجميلة
اللي عملتها بقى من مواقف الفزة اللي عملتها
قدرت تستوعب الجميع تمام؟

أولاً كانت لما دخلت على النبي عليه الصلاة
والسلام هي عارفة ان النبي عليه الصلاة
والسلام مصاب حلو؟ ومتألم طبعاً فقد خديجة
والموضوع صعب عليه

عارفين كانت بتعمل إيه؟ كانت متعمدة إن
هي لما تقعد معاه تقعد تكلمه عن رقية

خد بالكم رقية فين دلوقتي؟ رقية لسه في
الحبشة رقية ما رجعتش؟ مع سودة؟ رقية
كملوا الحبشة عادي فهي مش موجودة دلوقتي
ف لما تقعد معاه اللي هي جايزة عايزة تعلن
تعمل إعلان إعلان للنبي عليه الصلاة والسلام
أنا مش جايزة أنافس حد، أنا مش جايزة أبقي
أغير من بناتك وبناتك يغيروا مني بالعكس
فكانت تحكي كثير عن رقية لما تقعد معايا بس
أنت عايز تفتح موضوع تقول له عارف لما
كنت في الحبشة دي رقية بنتك دي جميلة
وعملنا كذا وضحكنا وروحنا وجينا وحصل
مواقف وسيدنا عثمان ده يعني ما شاء الله عليه
ربنا يبارك لك في يعني في بنتك وفي جوزها
وتقعد تحكي له بقي عن رقية دي واحدة
متجوزة وداخله على بنات من المرأة اللي

قبايها مفروض إيه مش مش عايزة أجيب
سيرتهم مش عايزين يجيبوا سيرتي ما هو ده
الشغل اللي أنا بنشوفه في الواقع حوالينا لا
دي بتتعمد إن هي تقعد تحكي له وتسليه ما هو
طبعاً لما تحكي له عن رقية دي بتطيب خاطره
وهو عليه الصلاة والسلام برضه مكلوم من
فقد إيه خديجة ف لما تقعد تقول له على بنات
وبناتك حلوين ورقية ديت صاحبتى وكنا هناك
كان يسر عليه الصلاة والسلام يفرح قوي لما
تيجي تكلمه عن إيه؟ عن رقية فكانت تدخل
السرور عليه وتؤنسه عليه الصلاة والسلام
محتاجين الزوجة كده اللي هي تدور على
المواضيع اللي تفرح جوزها، مش تنكد عليه
ها زوجك شايل الهم قاعد ضحكيه

زوجك شاييل الهم اختاري الموضوع فاكر لما
زمان ولعبنا وروحنا وجينا فاكر لما كنت
خاطبني وموقف فاكر في كتب الكتاب عملنا
إيه؟ ناخده بقى إيه؟ نحكي له أي حكاية حتى
لو متعمدة متكلفة هنغير جو

لكن رجل متكد وداخل وبتاع مشاكل أمك
عملت أختك عملت طب ما يعني طب لو
زعمق فيك ولا عمل فيك ما هو ما هو محدش
يجيب ، يا جماعة في عقل فيه حكمة في
التصرف في كلام يقال وكلام ما يقالش في
في كلام بينفع في وقت ما ينفعش في وقت
فالكلام حلو الكلام بلاش والله الكلام ببلاش
الكلمة الطيبة صدقة فكانت بتقعد بقى إيه؟

تحاول تسعده عليه الصلاة والسلام كانت تحب
تهزر معاه عليه الصلاة والسلام السيدة السيدة

سودة كانت سميكة فكان لها ماشية كده عارفين
ان الست لما تبقى سميكة واه رجليها بقى
وجعاهما؟ كان ليها ماشية كده كانت حاول
تمشيها قدام النبي عليه الصلاة والسلام عارفة
أن هو كان إيه؟ كان يضحك يعني من مشيتها
رضي الله عنها وأرضاه ما كانتش بتزعج
الموضوع دوت يعني، كانت تقعد تمشي قدامه
كده يعني فكان يضحك عليه الصلاة والسلام

وكانت من من لطفها أن مرة صلت وراء
النبي عليه الصلاة والسلام في قيام الليل وده
بقى امرأة صالحة كانت بتيجي مع النبي تخيل
الست بالسن ده وتصبر أن هي تصلي ورا
النبي عليه الصلاة والسلام حتى مرة صلت
معه ثاني يوم قالت له يا رسول الله صليت
خلفك البارحة صليت خلفك البارحة فركعت

وراءك حتى كاد يخرج الدم من أنفي، قالت
صليت خلفك البارحة قال فركعت أنت ركعت
حتى كاد الدم يخرج من أنفي يعني بتقول لي
أنا خلاص خلاص ده أنت مش كده ده أنا لو
كنت هموت في الصلاة طولت قوي بس
بهزار يعني هي عايزة تقول له أنا ما هي
صلت في الآخر بس يعني كانت بتلطف معاه

كانت بتحب هي عارفة دورها هي عارفة
دورها أنا جاية هنا جاية هنا أكون سكن جاية
هنا استوعب البنات جاية هنا أكون أم جاية هنا
أطف الجو جاية هنا أخفف عنه دور بالضبط
عملته

خدوا بالكم برضو ده رد على اللي يقول إيه؟
اللي يقول طب ليه النبي عليه الصلاة والسلام
اتجوز أصلاً؟ طب ما عنده بنات وده أحياناً

بيقال لواحد مراته ماتت يقول له طب ما
اتجوز ليه ما عندك بناتك يخدموك ويعملوك
ويشيلوا البيت طب ما هي فاطمة وأم كلثوم
كانوا شايلين البيت بس يا جماعة في حنة في
الزوجة ما تقدرش عليها لا الأخت ولا البنت
ولا الأم هو الدور اللي أحنا قلناه السكن دائماً
في حاجة كده سر بين الرجل وبين مراته ما
يعرفش تعمله البنت ولا الأم ولا الأخت ما
حدش يقول طب ما كان عنده بناته ولا واحد
يقول لواحد مراته ماتت طب ما عندك بنات
اتجوزت ليه؟ هو أنا مش عايز حد يغسل لي
المواعين؟ فمش عايز واحدة تنظف البيت أنا
عايز سكن سكن ودي آية بقى دي اللي ربنا
ذكرها في قوله تعالى { وَمِنْ ءَايَاتِهِ } [سورة
الروم : 21] عشان تقول يعني إيه من آياته؟

دي مش موجودة في بنت ولا أم ولد ولا أخت
{وَمِنْ ءَايَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا}
ليه؟ {لِتَسْكُنُوا إِلَيْهَا} مش دي مش موجودة في
حد { وَجَعَلَ بَيْنَكُمْ مَوَدَّةً وَرَحْمَةً إِنَّ فِي ذَلِكَ
لَءَايَاتٍ لِقَوْمٍ يَتَفَكَّرُونَ } فأني راجل محتاج
سكن دول ما فيش حد يقدر يعمله إلا زوجة
تمام؟ فحصل كده المهم يعني السيدة سودة إيه؟

حصل بقى موقف جميل قوي إن السيدة رقية
رجعت من الحبشة يا سلام كان إيه؟ كان يوم
جميل قوي فالسيدة رقية لما رجعت طبعاً لما
دخلت بيت خديجة اتأثرت قوي بقى ما هي ما
حضرتش الوفاة فشافت البيت وبتاع فتأثرت
وتألمت وكده خرجت فاطمة أم كلثوم استقبلوا
رقي وبعد كده لقيتها سودة حاولت سودة بقى
تخفف عنها بذكاءها فلقيتها وقعدت تتكلم معاها

إيه الأخبار الحبشة والناس عاملين إيه هناك؟
وإيه أخبار المسلمين في الحبشة؟ فاكرة لما
عملنا وفاكرة لما روحنا وفاكرة لما جينا
وقدرت تستوعب رقيقة وتحسبها إن إن
خلاص يعني أنا أقدر إيه؟ أخفف عنك
المصائب دوت سبحان الله يعني انشروا يا
جماعة دي اسمها زوجة أب دي زوجة الأب
شوفي علاقتها مع البنات عاملة إزاي؟ شوفي
علاقة البنات مع زوجة الأب عاملة إزاي؟

زوجة الأب مش جاية تنافس حد مش جاية
تنافس البنات دي جاية تؤدي دور دور عظيم
جداً مع البنات المهم النبي عليه الصلاة
والسلام هاجر بقى المدينة حلو؟ لما هاجر
طبعاً هو هاجر هو وأبو بكر ما كنش معه لا
بناته ولا سودة طبعاً عائشة لسه مش في بيته

دلوقتي هي كده كده هاجرت عن طريق أبي
بكر الصديق بشكل ما، لكن اللي هو كان يهمه
قوي يأجرهم بناته وسودة لإن دي البنات ودي
مراتي فأرسل بعد ما هاجر بقى خالص أرسل
زيد بن حارثة زيد بن حارثة تمام؟ وأرسل أبو
رافع وقال لهم تجيبوا لي بناتي طبعاً البنات
اللي هم كانوا إيه؟ فاطمة و أم كلثوم فاطمة و
أم كلثوم وقال لهم هاتوا سودة معاكم وهاتوا أم
أيمن وفعلاً راح زيد بن حارثة وبالجمال
وبتاع وانتقلت سودة رضي الله عنها إلى إلى
المدينة بعد كده النبي عليه الصلاة والسلام بعد
ما عائشة انتقلت للمدينة دخل بها كان لأول
مرة بقى تجتمع زوجات مع النبي عليه الصلاة
والسلام وبعد كده اتجوز حفصة.... فبقى له
زوجات عليه الصلاة والسلام لكن عايزين بقى

نشوف علاقة بقى بعد ما اتجوزت عائشة
بالنبي عليه الصلاة والسلام علاقتها بسودة
كانت عاملة إزاي؟ سودة يا جماعة كانت
بتحب عائشة وكانت عائشة بتحب سودة وكان
هي قدرت تستوعبها برده بتكلم واحد تسع
سنين يا واحد أصلاً معدية الخمسين وواحدة
تسع سنين فالسيدة عائشة هي شايفها مافيش
تنافس أصلاً يعني تمام؟ ف الشاهد يعني اللي
عايز أقوله إن إن السيدة...

النبي عليه الصلاة والسلام زي ما قلنا هاجر
للمدينة هاجر للمدينة و قال بعث زيد بن
حارثة وبعث أبو رافع إلى مكة وجابوا قلنا
السيدة سودة وفاطمة وأم كلثوم تمام؟

أجتمع بقى الكلام ده في المدينة النبي عليه
الصلاة والسلام دخل بالسيدة عائشة وكانت

السيدة سودة خلاص لأول مرة يكون لها ضرة
قدرت إن هي تستوعب السيدة عائشة وكم ان
يكون بينهم علاقة كويسة ومداعبة كمان السيدة
عائشة حتى اتمنت إن هي تبقى زيها زي ما
قلنا قبل كده تمام؟ ف لدرجة إن مرة حصل
موقف مضحك أوي كان النبي عليه الصلاة
والسلام أحياناً يجمعهم مع بعض يعني يبقى
هو في بيت عائشة يخلي أم سودة تيجي تقعد
معانا يبقى في بيت سودة يقول لها عائشة
تعالى أقعدي معانا

فكان مرة في في بيت واحدة منهم وكانت
السيدة عائشة عاملة أكل عاملة أكلة كده اسمها
الحريرة حاجة كده عاملة زي إيه؟ زي حاجة
عجين كده وبتاع زي سد الحنك بالمصري
فعاملة أكلة فقاعدة مع النبي عليه الصلاة

والسلام قدمت له اكل قالت لسودة كلي يا
سودة كلي من طيخي ها أنا طابخة، لازم
تأكلي هتأكلي يعني هتاكلي ف طبعاً إيه؟

ياخدوا السيدة عائشة كان لسه بتتعلم في الاول
ف إيه السيدة سودة قالت لها لا مش عايزة اكل
قالت لا أريد أن أكل لا لا لا أنا مش مش
عايز اكل قالت لها هتأكلي يعني هتأكلي قالت
لها عايزة اكل انا حرة انا مش عايزة اكل انا
مش عايز اكل هتجربي في لا انا مش عايز
قالت والله لتأكلن او لالطخن وجهك به
لالطخنك ، هأخذ الأكل أحطه في وشك قالت
لها طب طب مش هأكل يلا وريني هتعملي
إيه؟ وفعلا السيدة عائشة عشان تعرفوا إيه
كانت السيدة عائشة تتمنى تبقى زي السيدة
سودة السيدة عائشة ممكن إيه يعني تغير ولا

تروح عاملة موقف كده زي ما كسرت طبق
قبل كده وبتاع فكانت صغيرة يعني واستوعب
منها ذلك طب طيب راح خدت الأكل وفعلا
حطيته في وشها أنا مش مصدق خدت الأكل
وحطيته في وشها فعلا ولطخة جابت في حثة
من الأكل وقعدت تعمل كده في وش سودة

سودة عندها حاجة وخمسين سنة النبي عليه
الصلاة والسلام ما مسكش نفسه من الضحك
بقى قعد يضحك يضحك على عملية السيدة
عائشة وكأنه يعني مش مصدق أنت ازاي
عملت كده وبعد كده النبي عليه الصلاة
والسلام عمل ايه خلى سودة تاخذ من الأكل
تمام وقال لها أن خدي حقك خدي حقك اقتصي
منها وكان هو قاعد ما بينهم عليه الصلاة
والسلام أصلا فلما سودة حطت إيديها في

الأكل راح راجع لورا عليه الصلاة والسلام
كانه بيقول ليها ايه اتعاملي بقى ففعلا راحت
سودة خدت الأكل ولطخ بوجه عائشة رضي
الله عنها وأرضاها والنبى عليه الصلاة
والسلام قعد يضحك ما بينهم متخيلين دي
علاقة بين ضرائر بس الدنيا عادي في الخفيف
وبنهزر مع بعض يعني فكانت بتحب الضحك
هي رضي الله عنها وأرضاها كان دمها خفيف
وممكن ما تعتبرها حاجة زي دي إهانة تبقى
تقلب الموضوع جد وسنك وأنت صغيرة وأنا
كبيرة خدت الموضوع إيه زي ما قلنا يا
جماعة دماغ دماغ جامدة جدا أنا مش جاي
أنافس حد أنا مش جاي أنافس حد أنا جاي
استوعب موقف أنا عارفة دوري كويس
فخدت الموضوع بهزار وخدي ويلا وطب

وأنتِ كمان وخلص الموضوع وحقنا وعدى
الكلام خلاص سبحان الله يعني جميلة المهم
يعني السيدة سودة إيه عملت الموقف ده اه
بصوا بقى الجمال بقى بعد كده سودة رضي
الله عنها وأرضاها لما كبرت بقى هي ما
تعرفيش ليه حسست جاء بالها كده خاطر قالت
أنا كبرت وزوجات النبي عليه الصلاة والسلام
كثروا وحاسة كده أن النبي عليه الصلاة
والسلام هيطلقني مع إنه كان ما قالش كده
أصلا ولا لمح بكده ولا ولا يعني وده مش
متوقع منه الصلاة والسلام بس هي هي حسست
مش يعني قالت أنا الكبيرة وأنا خلاص وأنا
أصلا يعني كان وأخذني في الاول كده يعني
جبر جبر بخاطر وبتاع يعني وكلهم صغيرين
وحلوين أنا خايفة إيه في يوم من الأيام إيه

يسيبني خيفة يطلقني أنا عايز أعيش معاه
عايز أكون زوجته في الجنة طب أنت قلقانة
من إيه حد قال لك في حد حاجة هو ما قالش
حاجة ولا قال هيطلقها ولا عبر عن كده
خالص وده مش الظن به عليه الصلاة والسلام
بس قالت أنا أعمل إيه أعمل مبادرة وأكسب
أكسب صحبة النبي عليه الصلاة والسلام قالت
له يا رسول الله أنا اه عايز أقول لك حاجة قال
لها قولي

قالت له مش أنت بتعدي على كل واحدة فينا
ليلة للزوجات أه السيدة عائشة إيه لو أنا ليلة
وزينب ليلة والكلام ده أه قالت له بص أنا
متبرعة بلياتي لعائشة قال لها بجد اه قالت له
بجد والله وراضية ومبسوطة والله ما ز علانة
أبدا أنا أنا بس بس بشرط خليني جنبك طول

الحياة ما تسبنيش أبدا ما تطلقنيش هو أنا ما
كنتش هطلقك مش مشكلة بس أنا كده كده
خلاص أنا راضية ومبسوطة وأنا عايزة
أبسطك وأنا اصلا عارفة إنك أنت بتحب
عائشة أنا عارفة وحاسة بكده وعارفة جوايا
إن أنت بتحب عايش ودي أحب واحدة ليك
وأنت نفسك تقعد معها وقت أطول بس أنت
بتراعيانا وبتجبر بخاطرنا وتعدي علينا بس أنا
بقول لك أنا راضية ومبسوطة ووالله مش
زعلانة وأنا إن أنت ترضى أحب اللي من أن
أنا أرضى وإن أنت لما ترضى ربنا هيرضى
عني فخد ليلتي لعائشة أنا متبرعة بها لغاية ما
أموت وراضية ومش زعلانة خالص يا سلام!
فالنبي عليه الصلاة والسلام في الحقيقة قبل
العرض يعني هي فعلا كانت راضية وفعلا

مصرة هي اللي مصرة وهو فعلا النبي عليه
الصلاة والسلام كان بيحب عائشة جدا فقبل
ذلك منها يعني تحس إن في ايه هنا الوفاء بقى
يعني أصلا كونه اتجوزك أصلا من البداية لا
دي كانت حركة عالية جدا من النبي عليه
الصلاة والسلام كان مستتية وفاء بقى من من
ايه من سودة ووفت معاه وقفت معاه فعلا
وادت يومها لعائشة وزى ما أنت أكرمتك
واتجوزتني أنا أكرمتك وتركتك لعائشة رضي
الله عنها وزى ما عائشة برضو لما أنا كنت
ضارة لها في يوم من الأيام عاملتني كويس
كانت تهزر معايا وتضحك يعني كانت
بتعاملني كويس وزى امها أنا برضو وفاء
لعائشة بالذات أنا هرد لك فكانت امرأة وفيه
امرأة وافية يا جماعة فين النساء الوفية اللي

تعرف الجميل اللي اتعمل معاها ترده تقدر
الناس كلام كبير قوي يعني يا جماعة مش
عارف سودة دي مكناش نعرفها إزاي

وكانت سودة رضي الله عنها وأرضاها مرة
خرجت لقضاء حاجتها بعد ما نزلت آية
الحجاب تمام فخرجت لقضاء حاجتها سيدنا
عمر لقي في الطريق فهو عارفها أصل السيدة
سودة باينة بتبان لإن هي حتى يعني شكل
جسمها ببيان إن أي حد يعرفها يعني بتبان من
مشيتها من من الشكل العام لها مع أنها كانت
منتقبة بس هي طالعة فسيدنا عمر لقاهها طالعة
بعد ما نزلت آية الحجاب وإذا سألتهم متاعا
فاسألوهن من وراء حجاب فعاتبها قال لها
طالعة ليه يا سودة أنا عارفك قال يا سودة لا
تخفين علينا أنا عرفتك فكأنها اتخرجت من

كلمة سيدنا عمر يعني عايز يقولها أنت
بتخرجي ليه فبتقول لها يعني أنت يعني أكيد
في سبب بخرج يعني كانت رايحة تقضي
حاجتها في مكان بعيد وكانوا زمان ما فيش
حمامات جوة البيت فرجعت للنبي عليه
الصلاة والسلام اشتكت له إن سيدنا عمر قال
لي كده واتخرجت شوية فالنبي عليه الصلاة
والسلام أذن لهن أن يخرجن لحاجتهن أذن لهن
صلى الله عليه وسلم قال إنه قد أذن لكن أن
تخرجن لحاجتكن يعني لو سيدنا عمر قابلك
بعد كده قالوا له ده إذن من النبي عليه الصلاة
والسلام كانت السيدة سودة سبابة للطاعات أنتم
عارفين حجت مع النبي عليه الصلاة والسلام
تمام حجت مع النبي عليه الصلاة والسلام في
يوم أنتم عارفين الحج بيبقى فيه فيه عرفة

وبعد كده بنروح مزدلفة وبعد كده بنروح
نرمي الجمرات في منى حلو، عرفة مزدلفة
منى ففي مزدلفة المفروض بنبات وبعد كده
نروح نرمي الجمرات في منى فلما بنبات
ونروح نرمي جمرات في منى فكل الناس
بتتحرك الصبح تروح الجمرات فالدنيا تبقى
زحمة فالسيدة سودة استأذنت النبي عليه
الصلاة والسلام إن هي ما تباتش عشان تروح
في البدري وترمي الجمرات بدري قبل
الزحمة وده يدل على حرصها إن هي تعمل
العبادة صح هي تروح معهم الصبح بس دول
هبقى مش قادرة عايزة تعمل عبادة صح قالت
له أروح بدري شوية عشان أرمي الجمرات
صح عايز اقعد أرمي وادعي واركن أنا ست
كبيرة مش هقدر على الزحمة فكانت حريصة

قوي على العبادة سبحان الله أنتم عارفين بقى
من المواقف الفذة ليه للسيدة سودة إن النبي
عليه الصلاة والسلام بعد ما زوجاته حجوا
معه حجة الوداع ديت قال لهم النبي عليه
الصلاة والسلام قال هذه ثم ظهور الحصر
يعني ايه هذه ثم ظهور الحصر قال لهم يعني
بعد الحجة دي خلاص ما تحجوش ثاني ما
تحجوش ثاني يعني الأفضل ليا الأحب ليا إنكم
تفضلوا في بيوتكم وما تحجوش ثاني فالسيدة
سودة قالت بعد ما سمعت النبي عليه الصلاة
والسلام قال هذه ثم ظهور الحصر يعني
تعدوا على الحصر يعني ما تطلعوش من
البيت يعني فقالت سودة على طول لا أحج بعد
اليوم أبدا أمثالاً لأمر النبي عليه والسلام طب
شوف ماجادلتش رغم إن ممكن واحدة منكم

تسمع الكلام ده تقول ليه وماله الحج طب ما
الحج يا جماعة ده أمر النبي عليه الصلاة
والسلام البنت اللي بتجادل في أمر النبي ليه
ربنا فرض الحجاب ليه النبي عليه الصلاة
والسلام قال لا اصافح امرأة هو لو صافح
هيحصل ايه طب ايه المشكلة نصافح الرجاله
هو أنا وحشة هو أنا قليلة الأدب كلام بقى نقعد
بقى نهري بقى ليه الموسيقى غلط طب ما هي
حلوة طب ما هي ما نسمع الكلام وخلاص "
لَقَدْ جَاءَكُمْ رَسُولٌ مِّنْ أَنْفُسِكُمْ عَزِيزٌ عَلَيْهِ مَا
عَنِتُّمْ حَرِيصٌ عَلَيْكُمْ بِالْمُؤْمِنِينَ رَءُوفٌ رَّحِيمٌ"
تخيل بيقولهم ما تحجوش تاني ما تحجوش
تاني أنا عايزكم ما تحجوش تاني فسودة على
طول بكل بساطة قالت والله لا أحج بعد اليوم
حج قالت والله لا أحج بعد اليوم أمثالاً لأمر

النبي عليه الصلاة والسلام أنتم عارفين إن دي
ماتت في آخر خلافة عمر يعني عاشت سنين
طويلة بعد النبي عليه الصلاة والسلام
ماحجتش ولا مرة علشان تراضي النبي عليه
الصلاة والسلام في إن هو قال لهم أنا مش
عايزكم تحجوا ثاني خلاص كفاية كده عاشت
في زمن أبو بكر وعاشت في زمن عمر
وماتت في آخر خلافة عمر في خلافة عمر
كان عمر يحب يكرمها قوي رضي الله عنه
وأرضاهها فكان أحياناً يبعث لها فلوس كتير
مرة بعت لها شوال دنانير شوال دنانير فلما
شافت الدنانير كده دنانير يعني ذهب يا
جماعة ذهب ها عارفين جرام الذهب بكام
طبعاً تخيل لما واحد بقى يبعث لك شوال ذهب
هتعملي ايه أقول لك أنا سودة عملت ايه نادت

جارية لها قالت يا جارية اتئيني بالذهب قالت
خذي هذه لفلان وهذه لفلانة وفلانة تحتاج إلى
كذا وفلانة أرى أنها تحتاج إلى كذا وخذي هذا
لفلان وهذه لفلانة قال حتى لم يبق شيء من
الدينانير يعني طلعت كم كيلو ذهب كده يعني
كم كيلو ذهب في القاعدة كده يعني فكانت
شديدة الكرم رضي الله عنها وأرضاها آه
عاشت حياة جميلة عابدة كانت صوامة قوامة
كريمة طيبة طائعة وكانت روت أحاديث عن
النبي عليه الصلاة والسلام روت أحاديث عن
النبي عليه الصلاة والسلام وكان ممن أخذ
منها أحاديث عبدالله بن عباس خد منها أحاديث
عبدالله بن الزبير بن العوام خد منها أحاديث
وبعض التابعين أدركوها وأخذوا من الأحاديث
فكانت عالمة بتنقل الروايات صوامة قوامة

كريمة صلبة جميلة قمر قمر السيدة سودة قمر
قمر بجد اتعلمنا منها حاجات كثير قوي اتعلمنا
منها الأسوة والقدوة والأدب والأخلاق والصبر
والصلابة والشهامة والمروءة والكرم والوفاء
والصدق والصدقة والقيام إيه ده أنتم ما كنتوش
تعرفوها إزاي يا جماعة دي قدوتك بقى
النهاردة قدوتك سودة بنت زمعة رضي الله
عنها وأرضاها حفظنا اسمها خلاص عرفنا
السيرة لو مش عارفة تعملي زيها حبيها أحبوا
وسودة يا بنات أحببها سودة أحبوها من كل
قلوبكن سودة يا جماعة البنت اللي قاعدة تبص
للبيت البلو جر واللي قاعدة تبص للمثلة اللي
لابسة مش عارف إيه اللي قاعدة تبص
للمغنيات اللي قاعدين يبصوا للبنات
اليوتيوبرز أنتم فين من سودة دولا قدواتكم

براحتك المرء مع من أحب المرء مع من أحب
أحبوا سودة أحبوا سودة فإن المرء مع من
أحب لو أنتم بتزاکروا عشان الإمتحانات نقول
إذا أردتم أن تكونوا مع سودة في الجنة فماذا
أعددتكم لذلك أنت عايزة تطلعي الأولى على
الدفعة بتزاکري أنت عايزة تبقي مع سودة في
الفردوس الأعلى عملتي إيه عشان الموضوع
ده ها عملنا إيه عشان نبقي مع السيدة سودة
في الجنة أحنا نقول اللهم أحشرنا معها في
الجنة عملنا إيه عشان الموضوع ده إيه أخبار
حجابك إيه أخبار حيائك إيه أخبار أدبك إيه
أخبار أخلاقك إيه أخبار كرمك إيه أخبار
صلاتك وقيامك إيه أخبار إيه أخبار يا رب
أسبيكم بس بقي مش عايزين يعني أقفل معكم
أنا أنتم عارفيني لو زعقت بتبقى الدنيا خاينا

نقل كده مع الزكرى الجميلة دي وسيبها قدوة
كده وكل واحدة تحاسب نفسها على حب سودة
على الإقتداء بسودة والسؤال الأخير ماذا قدمتم
لتكونوا مع سودة رضي الله عنها في الفردوس
الأعلى وكده انتهت قصتنا الجميلة مع القمر
الجميل سودة بنت زمعة رضي الله عنها
وأرضاها إن شاء الله المرة القادمة نتقابل مع
سيرة جميلة عطرة أخرى جزاكم الله خيرا
سبحانك اللهم ربنا وبحمدك أشهد أن لا إله إلا
أنت استغفرك وأتوب إليك الله الله إيه رأيكم
بقى قبل اللايف كنتم إيه وبعد اللايف إيه ها
قبل اللايف اللا شيء اللا شيء عن سودة بنت
زمعة بعد اللايف الحب الحقيقي الحب الحقيقي
بجد جميلة سودة جميلة جميلة الجميلات فعلا
عشان كده يقولك بص على الرغم من السيدة

سودة يعني زي ما قلنا مش الجميلة الرشيقة
يقول لك القاعدة الدين يغطي أي عيب وقلّة
الدين ما تعوضهاش أي ميزة تاني الدين
والأخلاق يغطوا على أي عيب وقلّة دين ما
تعوضهاش أي ميزة فأظفر بذات الدين تربت
يداك أظفروا بالمتدينين تربت يداكم ما تقدميش
على الدين حاجة أبدا رضي الله عن سودة
حبيبتنا يا جماعة أمكم دي أمكم أفرحوا إيه ده
أفرحوا إن هذه أمكم لازم نفرح لازم نعمل
فرح نهدي أمنا أنا عايزكم ايه تفرحوا قوي
تحبوها قوي انشروا بقى الحلقة لما تنزل
هنزلها بكرة على اليوتيوب إن شاء الله
أشكركم على اللقاء الجميل ده سبحانه الله
ربنا وبحمد أشهد أن لا إله إلا أنت
استغفرك وأتوب إليك سلام عليكم.